

新城縣志



新城縣志目錄

卷之一 圖式志

縣境圖 縣城圖 縣治圖 學宮圖 諸河圖（原缺）

卷之二 方輿志

分野 疆域 四至 八景 形勝 沿革 山川

河議 風俗

卷之三 建置志

縣治 城池 官衙 學宮 學田 壇廟 寺觀

行署 鎮鄉 街市 村莊 橋梁 坊表

部鋪

卷之四 食貨志

戶口 土田 歲賦 徭役 馬價 鹽鈔

馬政 物產

卷之五 典禮志

公式 祀典 鄉飲 鄉射 賓興

卷之六 官師志

縣尹 監縣 主簿 典史 縣尉 知縣 縣丞

主簿 典史 教諭 訓導

卷之七 選舉志

徵辟 進士 舉人 恩選 歲貢 武秩 例貢

吏掾

卷之八 人物志

名賢 寓賢 封爵 善行 孝友 隱逸 壽耆

貞節

卷之九 恩恤志

封贈 祭葬 錄廕

卷之十 綸音志

勅諭 誥命 勅命 諭祭文

卷之十一 綜纖志

災祥 古迹 丘墓 仙釋 雜識

卷之十二藝文志上

奏議記

卷之十三藝文志中

傳序

卷之十四藝文志下

贊詞文詩吟歌疏誄

新城縣志卷之十三 藝文志(中)

傳

魯仲連傳

史記

魯仲連者，齊人也。好奇偉倬儻之畫策，而不肯仕官任職。好持高節。齊辯士田巴服狙丘議稷下，一日服千人。有徐劫者，其弟子曰：魯仲連，年十二號千里駒。往請田巴，爲陳當時利害，田巴曰謹聞命矣。巴謂徐劫曰：「先生乃飛兔也，豈直千里駒！」遂終身不談。魯仲連游於趙。趙孝成王時，而秦王使白起破趙長平之軍前後四十餘萬。秦兵遂東圍邯鄲。趙王恐，諸侯之救兵莫敢擊秦軍。魏王使客將

軍新垣衍間入邯鄲，因平原君謂趙王尊秦昭王爲帝。魯連乃見平原君曰：「事將奈何？」平原君曰：「勝也何敢言事！前亡四十萬之衆於外，今又內圍邯鄲而不能去。魏王使客將軍新垣衍令趙帝秦。今其人在是。勝也何敢言事！」魯仲連曰：「吾始以君爲天下之賢公子也，吾乃今而後知君非天下之賢公子也。梁客新垣衍安在？吾請爲君責而歸之。」平原君曰：「勝請爲君紹介而見之於先生。」平原君遂見新垣衍，曰：「東國有魯仲連先生者，今其人在此，勝爲紹介，交之於將軍。」新垣衍曰：「吾聞魯仲連先生，齊國之高士也。衍，人臣也，使事有職，吾不願

見魯仲連先生。」平原君曰：「勝既已泄之矣。」新垣衍許諾。魯仲連見新垣衍而無言。垣衍曰：「吾視居此圍城之中者，皆有求於平原君者也；今吾觀先生之玉貌，非有求於平原君者也，曷爲久居此圍城之中而不去？」魯仲連曰：「世以鮑焦爲無從頌而死者，皆非也。衆人不知則爲一身。彼秦者，棄禮義而尚首功之國也，權使其士，虜使其民。彼即肆然而爲帝，過而爲政於天下，則連有蹈東海而死耳，吾不忍爲之民也。」因極陳帝秦之害。於是，新垣衍起，再拜謝曰：「始以先生爲庸人，吾乃今日知先生爲天下之士也。吾請出，不敢言帝秦。」秦將聞之，爲却軍五十里。適

會魏公子無忌奪晉鄙軍以救趙擊秦軍，秦軍遂引而去。於是平原君欲封魯連，魯連辭讓使者三，終不肯受。平原君乃置酒。酒酣起前，以千金爲魯連壽。魯連笑曰：「所貴於天下之士者，爲人排患釋難解紛亂而無取也。即有取者，是商賈之事也，而連不忍爲也。」遂辭平原君而去，終身不復見。其後二十餘年，燕軍攻下聊城，聊城人或讒之燕，燕將懼誅，不敢歸。齊田單攻聊城歲餘。士卒多死而聊城不下。魯連乃爲書，約之矢以射城中，遺燕將。燕將見魯連書，泣三月，喟然嘆曰：「與人刃我，寧自刃。」乃自殺。聊城亂，田單遂屠聊城。歸而言魯連，欲爵之。魯連逃隱於海。

上，曰：「吾與富貴而詘於人，寧貧賤而輕世肆志焉。」太史公曰：魯連其指意雖不合大義，然余多其在布衣之位，蕩然肆志，不詘於諸侯，談說於當世，折卿相之權，亦可謂抗直不撓矣，吾是以附之列傳焉。

顏觸傳

戰國策

齊宣王見顏觸，曰：「觸前。」觸亦曰：「王前。」宣王不說。左右曰：「王，人君也。觸，人臣也。王曰觸前，觸亦曰王前，可乎？」觸對曰：「夫觸前爲慕勢，王前爲趨士。與使觸爲慕勢，不如使王爲趨士。」王忿然作色曰：「王者貴

乎？士貴乎？」對曰：「士貴耳，王者不貴。」王曰：「有說乎？」觸曰：「有。昔者秦攻齊，令曰：『有敢去柳下季壟五十步而樵採者，死不赦。』令曰：『有能得齊王頭者，封萬戶侯，賜金千鎰。』由是觀之，生王之頭，曾不若死士之壟也。」宣王默然不說。左右皆曰：「觸來，觸來！大王據千乘之地，而建千石鐘萬石簾。天下之士，皆爲役處，辯智并進，莫不來語，東西南北莫敢不來服，萬物無不備具，百姓無不親附。今夫士之高者，乃稱匹夫，徒步而處農畝，下則鄙野監門閭里，士之賤也亦甚矣。」觸對曰：「不然。觸聞古大禹之時，諸侯萬國。何則？德厚之道，得貴士之力也。故

舜起農畝，出於野鄙，而爲天子。及湯之時，諸侯三千。當今之世，南面稱寡者，乃二十四。由此觀之，非得失之策與？稍稍誅滅，滅亡無族之時，欲爲監門閭里，安可得而有也哉！是故易傳不云乎：居上位，未得其實，而喜其爲名者，必以驕奢爲行。踞慢驕奢，則凶必從之。是故無其實而喜其名者削，無德而望其福者約，無功而受其祿者辱，禍必握。故曰：矜功不力，虛願不至，此皆幸樂其名，而無其實德者也。是以堯有九佐，舜有七友，禹有五丞，湯有三輔，自古及今而能虛成名於天下者無有。是以君王無羞亟問，不愧下學，是故成其道德而揚功名於後世者，堯、舜、

禹、湯、周文王是也。故曰：無形者，形之君也。無端者，事之本也。夫上見其原，下通其流，至聖明學，何不吉之有哉！老子曰：雖貴，必以賤爲本；雖高，必以下爲基。是以侯王稱孤寡不穀，是其賤之本非與？夫孤寡者，人之困賤下位也，而侯王以自謂，豈非下人而尊貴士與？夫堯傳舜，舜傳禹，周成王任周公旦，而世世稱曰明主。是以明乎士之貴也。」宣王曰：「嗟乎！君子焉可侮哉，寡人自取病耳！及今聞君子之言，乃今聞細人之行，願請吏爲弟子。」且顏先王與寡人游，食必太牢，出必乘車，妻子衣服麗都。」顏觸辭去曰：「夫玉生於山，制則破焉，非弗寶貴矣，

然大璞不完，士生乎鄙野，推選則祿焉，非不尊遂也，然而形神不全。觸願得晚食以當肉，安步以當車，無罪以當貴，清淨貞正以自虞。制言者王也，盡忠直言者觸也。言要道已備矣，願得賜歸，安行反臣之邑屋。」則再拜而辭去。君子曰：「觸知足矣，歸真反璞，則終身不辱。」

轅固傳

山東通志

固，齊人，天性剛正，羞爲掩阿態，好面折人。少治詩，爲之傳，是爲齊詩。漢初有魯人申公受詩於浮丘伯作訓詁，是爲魯詩。燕人韓嬰亦傳詩，是爲韓詩。三者皆列於學官。景

帝時，固爲博士，以廉直拜清河王太傅，疾免。武帝即位，表章經術，徵召儒生，復以賢良被徵。諸儒多嫉毀曰：「固老。」罷歸之時，年已九十餘。公孫弘亦被徵，仄目事固，固曰：「公孫子務正學以言，毋曲學以阿世。」諸齊以詩顯者皆固弟子。於時，言易則有田何，言書，則有伏勝，言禮則有高唐生，言春秋則有胡毋生，皆齊人。太史公曰：「齊魯之於文學，其天性也。」詎不信哉！

牟萇傳

山東通志

萇，字君，高樂安臨濟人也。其先封牟，春秋末，國滅，因氏

焉。少習歐陽尚書，不仕。大司空宋弘特辟拜博士，遷河內太守，坐墾田不實免。葺自爲博士，及在河內，生徒講學者常至千餘人。所著尚書章句，皆本之歐陽氏，俗號爲牟氏章句。復徵爲中散大夫，子紆隱居教授，門生亦千餘人。肅宗聞而徵之，欲以爲博士，未至，卒。

張元帥傳

劉

贊

邑人
進士

諱貴，字國寶，性孝友，善騎射。大安中，朝廷選天下猛士守衛京師，貴時方弱冠，中選。以功累遷輔國上將軍，行高苑縣令。已而充山東路兵馬左副元帥，終於般陽軍節度

使。金季，山東豪杰角立，公實爲甲乙。是時，行省張林約爲弟兄，以公兄榮爲腹心，以公爲爪牙，一時諸將無不景仰。公之爲人輕財好義，深得爲政之要。知瘡痍之民不可虐，用政務寬簡，省刑薄賦，興利除害，使百姓數載間帖然享富安之樂。輕裘肥馬，與朋友共，結交以誠信，與人有始終。家資鉅萬，絲毫不視，悉委之昆弟。其宇量寬宏如此。

郝千戎傳

劉元

中選儒人

郝青，字正卿，父全，世居高苑古臺驛鎮之西。家巨富，不驕不華，性樂爲善。青少有膽力，多機變，尤精武藝。一日，